

## BERTSO-AFARIA

Hona hemen 1999ko Maiatzaren 7an Presoen aldeko ekimen batzordeak Ixkulin elkartearen antolatutako afarian Iñaki Murua eta Jokin Sorozabal bertsolariek kantatutako bertsoak.

Gai-jartzailea: Joxe Luix Agirretxe.

### - Hasierako agurra:

Jokin Sorozabal

1

Gabon denori gure lagunak  
esaten zuen bezela  
pentsatu degu bertsoarako  
garaia oraintxe dela.  
Ikusten baita, purua piztu  
ta patxaran zaudetela  
gaurko afariak eta bertsoek  
on egin dakizutela.

3

Sukaldariak portatu dira  
ezetz ez zait iruditzen  
hortxe zebiltzan janari hoiek  
beren puntuan karraitzen.  
Arrai-zopa ta gero haragia  
aspaldi horren premin nintzen  
hoiek naiko lan izan dute bai  
mahai luze hau zerbitzen.

5

Egia da bai, hauek afari  
ona dutela zerbitu  
nere sabelak zuen tokia  
azkenerako gaintitu.  
Zerbitzariak tarta zatian  
puska batzuk eaman ditu  
haseran asko jan baitet nik gaur  
postria ezin kabit.

Iñaki Murua

2

Ongi etorri lagunartera  
holakoxea behar du  
iritsi eta gustora gaude  
nola lagun ala otordu.  
Gainera zorte paregabea  
zuen artean daukagu  
sukaldariei eskerrik asko  
ederki afaldu degu.

4

Eskertu bear zen sukaldekoa  
ta berdin zerbitzaria  
ona zegola neuk ere hala  
baina ote da egia?  
Jokinek hola pelota eiteko  
barruak izan bear dia  
ona zegola eta hor bueltan  
bialdu baitu erdia.

6

Egia esan du, arrazoi hori  
noski ez gendun harrotza  
geitxo jateko lekurikan ez  
edota bestela lotsa.  
Aizkenerako haseran asko  
ta gero apetitu motza  
berriro ere eukiko dek hik  
sudurra zorrotz-zorrotza.

7

Mai-ixkin hontan ikusten degu  
hemendik bista ederrik  
bertsolariak jarri dituzte  
ta ez dago esan beharrik.  
Hemendik hauntza begiratzea  
nik izango det alperrik  
I-akik denak ikusten ditu  
ta nik erdiak bakarrik.

9

Nere lagunak bertsoen bidez  
neri egiten dit burla  
mahai buruan jartzean kontra  
ez naiz izaten sekula.  
Baina antolatzen ari direnek  
zerbait nai zuten kalkula  
Sorozabalek mai-bururako  
kategoririk ez dula.

11

Bertso kontuan hasi geranez  
nik hartzen det hari bera  
elkarte hontan sartutakuan  
piska bat harritu gera.  
Han jartzen duen testua ere  
ah! zenolako aukera  
ta hala ere Lezon oraindik  
bertsolaik ez da atera.

8

Arrazoi dezu oraingoan'e  
zu azkarra, alajaina!  
baina erdia ikusten dezu  
zeure sudurran ordaina.  
Hobe zenduen mutur honetan  
zen jartzea alajaina  
ia erdiraino helduko zinan  
zeu hemen jarri bazina.

10

Sorozabalek beti izan du  
bertsoetan martingala  
beure irudia aprobetxatuz  
ahal dala nola hala.  
Zuri burlaka ni ez naiz hasi  
etorri ta berehala  
baina aitortzen dut bertsoetarako  
usaimen ona daukala.

12

Helburuz beintzat lagun artea  
gidari duten kabira  
heldu gera ta gu zuzenean  
sartu bertso-afarira.  
Lezo aldean bertsolariak  
ez omen dute segira  
bertso-afai asko eginezkero  
laster aterako dira.

13

Afari asko eginezkero  
bertsolariak berehala  
iruditzen zait nere lagunak  
eskarmentua daukala.  
Baina guk orain, ta hemen norbait  
behar degu nola hala  
gai-jartzaile bat beintzat badute  
ta demostratu dezala.

## Ofizioetan:

*Zu Murua 19 urte kartzelan pasa eta kalera irten berria den 45 urte ingurko gizasemea zara. Taberna batean baxoerdiak hartzen ari zarela 19 urteko neska gaztea, (J. Sorozabal) hurbildu zaizu eta bere maitasuna deklaratu dizu.*

*Hiruna bertso zortziko nagusian eta nahi duzuen doinuan.*

### Jokin Sorozabal

1

Hainbeste urte kartzela barrun  
ezin litezke aguanta  
baina noizbaten atera dute  
eta hemen hau da marka.  
Bere ondora joan et'ahotik  
zerbait nai nioke kanta  
poz piskat eman beharko diot  
premian izango da-ta.

3

Amodioa aipatzen duzu  
ta zernolako kontuak  
urte askotan urruti egon  
dira zu bezelakuak.  
Gaur amodio asko ditugu  
bakarrik gau batekuak  
amodioak orain ez dira  
lenago bezelakuak.

5

Beraz hoinbeste egingo dizut  
ez apuratu laguna  
zuk neri egindako eskeintza  
oso pozik det entzuna.  
Ni jaiotako gauean zinan  
espetxe aldera juna  
orain zurekin ospatuko det  
urtebetetze eguna.

### I. Murua

2

Poza bakarrik etzaidazu eman  
eman zaidazu bi musu  
aspalditxoan bakardadean,  
maitasun premiz naukazu.  
Aho zabalik, begi zabalik  
ni zur eta lur naukazu  
hemeretzi urtez amestutako  
amodioa zera zu.

4

Horrelakorik entzun gabe're  
ze desio entzun nezan  
ia irtetzeko ere sarritan  
egoten nintzan perezan.  
Lengo hitz goxoak berriro ere  
behar dizkidazu esan  
nere bihotzak aspaldi ez duen  
gozamena bizi dezan.

6

Nik zuregandik jasoak ditut  
hain poztasun nabarmenak  
bi buelta eta geio eman dizkit  
dagoeneko barrenak.  
Kartzelan preso pasatu ditut  
biziko urte onenak  
askatasuna zertarako du  
bizitzen ez dakienak?.

**-Bakarka:**

*Gaia: zuk non aldatuko zenuke lizar bat?*

**Iñaki Murua**

Arrazoa etorri zait  
zuzen- zuzenean  
ta bota beharko det  
zuen omenean.  
Lezon nagola ohartu  
bainaiz azkenean  
hara nik aldaketa  
non da aidanean  
noski lenbizikoa  
Jaizkibel gainean.

Nola leku gehiago  
herrian badian  
Lizara ta Garazi  
hor dira abian.  
Batzuk urrun-antxetik  
daude inbirian  
bigarreña aldatu  
nahi nuke agian  
inbiritan dauzkagun  
hoin bihotz erdian.

Bi lizar aldatu-rik  
ta sasoi betean  
etorkizuna nola  
molda litekean.  
Burrukan jardun orde-  
z beti atakean  
atseden hartu nai dut  
itzal horren pean  
ta Euskadi batu bat  
ikus noizbaitean.

*Gaia: " Zu Puerto de Santa Mariako zie-  
ga bateko giltza zara "*

**J. Sorozabal**

Egia esan ezin  
lan ederra jartzen  
giltza hortxe ari da  
sarrailatan sartzen  
Gau eta egun ezta  
lanean geratzen  
jende asko ari da  
horra barruratzen  
ta aspaldian ezta  
inor ateratzen.

Giltzan eginkizuna  
ez dezagun haztu  
atea iriki eta  
bete edo hustu  
Aspaldi ikusi da  
hainbeste apustu  
egoera egin da  
piska bat erreztu  
baina espetxeko giltzak  
su etenik ez tu.

Ta hoiek dira hemengo  
atarramentuak  
giltzak egin beharko  
agindutakuak.  
Ez dira bere kargu  
bere merituak  
askatuko lituzke  
len sartutakuak  
baina giltzan jabeei  
eskatu kontuak.

-Puntuak jarrita:

I. Murua

*Ba al dakizu zer den  
zuk bakardadea?  
pertsonak izatea  
hurbila gordea  
Bakarrik egon behar  
laguna ordea  
hemen gaudenok degu.  
bizitza hobea.*

*Haur gutxi izaten du  
ama euskaldunak  
Zentzurik ba ote du  
honek esan dunak.  
Geio izaten baditu  
ama erdaldunak  
seinale ez du balio  
aitaren jardunak.*

*Arzallus, Arnaldo ta  
Garaikoetxea  
hoietzek pizten dute  
Aznarren letxea.  
Baina badaramate  
eundoko martxea  
segi behar lukete  
oraingo antzea.*

J. Sorozabal

*Alkoholemia berriak  
kezkatzen al zaitu?  
baten batek bearko du  
hori nabaritu.  
Baina txofer ez denak  
ez dauka delitu  
kopiloto izateak  
bentaja hoiek ditu.*

*Euroak bentajarik  
ekarriko al du?  
oso indartsua da  
hoi dute zabaldu.  
Naiz ta batzuk zerura  
hain gora bialdu  
len justu genbiltzanak  
baietz asko galdu.*

*Pentsatzen duzun hori  
adieraztazu  
gai-jartzaile lan zaila  
ematen didazu.  
Nik pentsatzen dudana  
entzun nai al dezu?  
hemen gaiak ipintzen  
kontu izan zazu.*

Orain joku-tankerako zerbait egingo dugu. Nik hemen boltsa bat daukat eta zuek bina jostailu edo tresna edota, dena delakoa atera eta hiruna bertso jarri nahi duzuen neurri eta doinuan. I. Muruak OBELIX atera du.

**J. Sorozabal**

Galia iparraldean  
aspaldi omen zan sor  
haurrek telebisioz  
ikusten dute hor.  
Hau bezain indartsurik  
han ez denez inor  
Saralegiren markak  
haustera omen dator.

Gaurko honetan ziren  
afaltzeko planak  
eta sukaldariak  
jateko esanak.  
Hoiek denak bukatzen  
guk nolako lanak  
honek berak bakarrik  
jango zitun danak.

**I. Murua**

Obelix galiarra  
ezaguna oso  
hemen gauden askontzat  
liteke akaso.  
Ezkerra behean dauka  
eskubia jaso  
hemen dago ttikitan  
Xebastian Lizaso.

Egundoko enborra  
eundoko gerritza  
borobil-borobila  
hau zeinek zerbitza.  
Erromatarren kontra  
Galiarren bizitza  
euskaldunok´e hauen  
antzera gabiltza.

Orain beste jostailu bat aterako dute: ZARTAGIA

I. Murua

1

Zartain berde-berde bat  
lagun honek gura  
horixe aterata  
hartu dun itxura  
Trikornio gisara  
jasoa burura  
"todos al suelo" esanez  
azaldu zen hura.

3

Beraz berori zaigu  
lenen frejituko  
ta sutan jartzeari  
egin behar uko.  
Ttiki edo eskasa  
horra hor lekuko  
hortik jan izan balu  
ez zan gizenduko.

5

Bi ezkeru hiru're  
beharko ba tira  
zartai polita da ta  
zertan erretira.  
Zenbait aho-zabalik  
jarririk begira  
sartuko litzaioke  
kontrako eztarrira.

J. Sorozabal

2

Plastikoa egundoko  
adelantua omen  
baina ikusi zartai hoi  
zeinen eskasa den.  
Sutan jarritakuan  
txarra degu zeren  
bera prejituko da  
arraultza baino len.

4

Zartai berde horrekin  
gu hasten bagera  
ez degu afaltzeko  
holako aukera.  
Ta gure otorduek  
nolako galera  
afaltzera joan behar  
amaren etxera.

6

Zartai hori ez degu  
hain izugarria  
Obelixen buruan  
hor dago jarria.  
Baina ez dute pasako  
hain trantze larria  
bestela betetzeute  
kontrako eztarria.

Oraingoan beste jostailua atera dute: TRENA.

**J. Sorozabal**

1

Bein behar ta oraintxen ere  
jarri diguten pastela  
esango nuke lezotar hauek  
piska bat jota daudela.  
Traste bat guri ematen hasi  
ta trena eman bestela  
esan liteke herri honetan  
trenbide faltan daudela.

3

Bati "Topoa" deitzen diote  
oso azkarra gainera  
ta beste bati "Norteko trena"  
aurrera eta atzera.  
Horrekin nunbait ezin osatu  
ez da naikoa, bai zera!  
eta orain hau igoko'men da  
Jaizkibelgo tontorrera.

**I. Murua**

2

Len bi trenbide badauzkate'ta  
nonbait ez zuten naikoa  
bata Renfe da ta bestea berriz  
euskaldunen bidekoa.  
Ta mai gainera ekarri dute  
beste bat alajainkoa!  
ttiki hau beintzat ez dute izango  
abiada haundikoa.

4

Badakizue gabiritarra  
baserritarra naizela  
horrexegatik konparaketa  
baserri giro bezela.  
Ikustazue hau mugitzen da  
igo eta berehala  
esan liteke tren ttikitto hau  
gaur susara dagoela.

Ondoren, beste tresna dute bertso-gai: AUSKULTAGAILUA.

**J. Sorozabal**

1

Guri jarri digute  
oso tresna fina  
pertonaren pultsua  
neurtzen dakina.  
Jendeari igartzen  
eintzak alegina  
emaitza emango dik  
denentzat berdina.

3

Gaur bertso-afarira  
gu Lezora juan  
kafeak eta kopak  
suelto inguruan.  
Gutxi markatzen gendun  
etorritakuan  
zer esango ote du  
abitzerakuan.

**I. Murua**

2

Dekatlonen erosi  
hainbat marabila  
beintzat gaur ekarri du  
egundoko pila.  
Azken hau zertako den  
asmatzea zaila  
auskultatu nai duna  
etorri dedila.

4

Hau ere beharko da  
noizean-noizean  
baina ez hartu behintzat  
nai dan bakoitzean.  
Asteburuan gabiltz  
wiskian haizean  
gero honen premia  
astelen goizean.



Lau oinak emanez, bertsoa osatuko dute oraingoan.

- Ziren, pakearen, herren, txarren
- Euskaltzale, ale, goragale, kale

## I. MURUA

Naia eta ezina  
txarrenetan txarren  
ibilbide latz hori  
degu pakearen.  
Ehun da geiago urte  
gabiltz bakez herren  
gure arbasoak ere  
halaxe izan ziren.

Ikuskizun munduan  
bada hainbat ale  
batzun pozgarri eta  
besten goragale.  
Euskal telebistakin  
hainbat euskaltzale  
txoratuta ikusten  
beti "Goenkale".

- Maitasuna, diruduna, duzuna, osasuna.
- Gorria, larria, irria, eztarria.

## J. SOROZABAL

Gizon, nik aditu det  
zuk esan duzuna  
hemen premizkoena  
dugu osasuna.  
Eta al balin bada  
izan diruduna  
harixe man behar zaio  
gure maitasuna.

Bertsoarekin ezin  
beti sor irria  
batzutan ezinean  
istilu gorria.  
Kantatu nai ta ezin  
hori da larria  
latzak ikusia da  
gure eztarria.

## Ofizioetan:

GAIA: Zu Murua, 17 urteko alabaren (Sorozabal) ama zara, gaur goizean haren gela txukuntzen ari zarela, kondoi paketea aurkitu duzu haren txaketaren patrikan. Hiru bertso nahi duzuen neurri eta doinuan.

## I. Murua

1

Zure txamarra ikusi eta  
ia txoratzeko zorin  
gaur goiz honetan lurrera ere  
justuan ez naiz erori.  
Ikusi eta neure buruai  
ia esan diot, tori!  
aizu alaba zer rarua dan  
"Ducados" pakete hori.

3

Ustekabean nik patrikari  
daunba! egin diot bisita  
sekreturen bat egon ziteken  
susmoa aurrez iritzita.  
Harriturikan aho-zabalik  
kaxa hori ikusita  
honek prezinto osua dauka  
ta zuk igual hautsita.

5

Aizu alaba, neroni ez naiz  
hain atzerakoi halare  
noski egin nintzan neure garaian  
nortasun piskaten jabe.  
Hau entzun zazu, aprobetxatu  
edade onean zaude  
goza ezazu seksuarekin  
elizai kaso egin gabe.

7

Urtez aurrera, eta ez dut nai  
neure bururik engaina  
orain kalera alabarekin  
nola juan alajaina!  
Baina zuk beintzat ein nai dezuna  
hartu egoerari gaina  
ez nuke naiko zuk sufritzerik  
nik sufritu dudan aina.

## J. Sorozabal

2

Arrazoi dezu, begia bota  
diozu pakete honi  
tabako hori zuk probatu  
eingo baitezue armoni.  
Gazteentzako soilik direla  
sarri entzuna nago ni  
berrogeitikan gorakoentzat  
ez omen dira komeni.

4

Hara amatxo, denborarekin  
gauzak aldatu egin dira  
eta gaurkoak ez gera bizi  
ez Bibliari begira.  
Garai batetik gauzak bastante  
joanak dira urrutira  
konfesatzera joaten zinan zu  
ta ni berriz, farmazira.

6

Hara amatxo poza hartzen det  
hau entzuten dedanian  
ez nun espero zu ikusterik  
gisa hortako planian.  
Ustekabean ama-alabak  
antzekoak geranian  
zuri re deitu egingo dizut  
kalera goazenian.

8

Zu lasai ama, nola alaba  
hain inuxentia ez den  
eta zergatik zu re ez zera  
gurekin kalera jeisten.  
Gu larunbatez, arratsaldetan  
planean oi gera hasten  
aita etxian utziko degu  
"ETB-Kantxa" ikusten.

## Bakarkako gaia:

Zu Murua, CESID-eko kide baten mikrofonoa zera.

### I. MURUA

Kanpoti helduta kale erdira  
egin dut lenen jauzia  
mikrofonotik konta nezake  
ikusten dudan auzia.  
Gazte jendeak badauka Lezon  
oiu eta irrintzia  
baten jartzen da pintada egiten  
egundoko trebezia  
"Puto vasco" hoiek ez dute egingo  
berak nai duten guzia.

Jasotakoa nik bidaltzen dut  
airean eiten du trote  
hoien artean azkarrik bada  
baitare hainbat arlote.  
CESID mundutik d  
iotenean  
omen dira monigote  
zentzugabeak, burugabeak  
hori erantsiko nioke  
Puto-vasco esan, ta hala ere  
txaloka erantzun diote.

Euskadi askatu eta librea  
hala eiten dute algara  
baina gu hemen hori eragozten  
alegindu behar gara.  
Kalean edo sede denetan  
sartuko naiz behar bada  
horrexegatik helburua dut  
txibaketek ez akaba  
Euskadi ez da ezer izango  
Espa-a barruan ez bada.

## Bakarkako, 2. Gaia:

Zu Jokin, Donostiako Bakearen (Usoa) eskulturan pausatu den benetako Bakearen usoa zera.

### J. SOROZABAI

*Doinua: Uso txuria errazu,....*

Nere hiru-lau iritzi  
nahi nituzke erakutsi  
Len pakearen uso bat bazen  
orain beste bat iritxi  
guk pakearen uso ugari  
eta pake gogo gutxi.

Adizu uso maitea  
etorri zaizu bestea  
baina pakea ez da uso bat  
zuriz jantzi ta arlotea  
baizikan elkar konprenditzeko  
egizko borondatea.

Hegan joan naiz urrutira  
Europa ta Etxe-Zurira  
Jugoslavian pasiak; ere  
ikaragarriak dira  
hemen pakea planteatzen da  
poltsikoaren neurrira.

## Ofizioetan:

Zu Sorozabal 10 urte kartzelan daraman presoara zara eta gaurko bisitan Murua anaia etorri zaizu ama zu bisitatzeraz zatorrela auto istripuan hil dela esanez.

Hiruna bertso nahi duzuen neurri eta doinu.

## I. Murua

1

Aizu anaia dar-dar barruan  
dardaraz gainez ahoa  
baina albiste tamalgarri bat  
zuri ematera noa.  
Ama laztanak bazuen noski  
zu ikusteko gogoa  
baina tamalez orain hartu du  
bidaia luzeagoa.

3

Egia da bai, zorigaitza da  
edo eta zoritxarra  
ez naiz harritzen sortaraztea  
begietara negarra.  
Esaerak dio, besterik ezta  
ama beti da bakarra  
pozik gehiena ematen zizun  
hark pena eman beharra.

5

Sakabanatze ta dispertsio  
hainbat ekarri herrira  
ama gauz horrek, lege txar horrek  
eraman du hilobira  
Mayor Orejaz gogoratzea  
aipatu ere ez dira  
seguru nago betiko gisan  
haik pozik egongo dira.

## J. Sorozabal

2

Hara anaia zer moduz zaude  
esanez hau egun berriz  
baina tankera hartu diot nik  
zerbaitetan gaizki gabiltz.  
Zuk esan baino lenago hemen  
igerri det hori guztiz  
bera bisitan egongo baitzan  
bizirik egongo balitz.

4

Nere bihotzak eta gogoak  
disgusto bat badaukate  
bizi zelarik ni ikusteko  
bazun hainbat borondate.  
Mayor Oreja eta lagunei  
hauxe esan nahi nieke  
semearekin naiko ez nunbait  
ta bere ama hil dute.

6

Aitu arrazoi ematen dizut  
hizketan hasi orduko  
gure ama juanda istripuan-ta  
ez det berreskuratuko.  
Len esandako hoiak ez dute  
guk hainbeste sufrituko  
ta hau ez dute terrorismoan  
biktimen listan sartuko.

7

Ez da lekurik holakoentzat  
zerrenda horren kasuan  
bein-betirako sartu gaituzte  
baztertuaren putzuan.  
Eutsi goiari, segi aurrera  
amak hala naiko zuan  
eta zugandik hori nai degu  
herrian eta auzuan.

## Gai librean:

Afari honen balantzea, edota zuen inpresioa.

### J. Sorozabal

1

Ikusi da bertsolariak  
zeinen langile dabiltzan  
entzuleak ere formal  
oso jende finan gisan.  
Gure ondoko gizon hau berriz  
nik ez dakit gaur zer esan  
pixa egitera joateko ere  
denborarik ez du izan.

3

Hara I-aki, esangoizut  
ze pentsatzen ari ginen  
Cesid-ena kantatzea  
hain gaizki ote zegoen?  
Oraindik ere ez dakigunez  
nundik bearke degun irten  
badaezpadare jakin behar da  
denetatikan egiten.

5

Hara lagun emangoizut  
oso erantzun zuhurra  
ta nik hartu behar banu  
horrelako lan makurra.  
Aldez aurretik esango nuen  
bertsoa ez dala xamurra  
eta erdia egia dala  
beste erdia gezurra.

### I. Murua

2

Hor jardun da komunikan  
ez baldin balitz bezela  
hustu beharrik ez duen  
zulo gabeko kupela.  
Iruditzen zait Zelesek gaizki  
Zelestinaren papela  
nei Cesid-eko mikrofonoa  
nola jarri dit bestela?

4

Andoaindarra beti izan da  
erantzun finetan maixu  
oraintxe're txukun asko  
eman dit neri abisu.  
Erantzun bera emango al zendun  
lengo bertso hortan, aizu?  
nei jarri orde z mikrofonota  
zuri jarri izan balizu.

6

Bertsoz ase nai zituen  
elkarte eta kaleak  
intentzio ona zuen  
gaurkoan gai-emaleak.  
Onak ta txarrak, denetik joanak  
gure bertsozko aleak  
denak maitatzen jakin behar du  
zinezko bertsozaleak.

7

Gai-jartzaile finazkua  
bagendun gaurko honetan  
ta gu're ez geunden oker  
honen itxaropenetan.  
Demostratu du badakiela  
lana hartzea benetan  
aste guzia pasako zuen  
lau oinekin ametsetan.

## Puntuka, beren gisara:

1

- I.M. - Zerbait izango dala  
badala naikoa,  
badala naikoa
- J.S. - Naikoa izan ote da  
guk esandakoa
- I.M.- Hori ez dakigula  
hor dago kakoa
- J.S. - Baina alegina izan da  
berebizikoa
- I.M.- Holaxe izaten da  
afalondokoa. (bis)

3

- I.M. - Egia esan dezu  
zenion bezela  
zenion bezela
- J.S. - Ez dezu ba esango zuk  
ados ez zaudela
- I.M. - Arrai-zopa bikaina  
ta berdin okela
- J.S. - Gaurko afaria zan  
ona ta itzela
- I.M. - Uste det kilo t' erdi  
gizendu naizela. (bis)

5

- I.M. - Badakit ziur-ziur  
esango ditena  
esango ditena
- J.S. - azalduko al zenduke  
entzungo dezuna
- I.M. - Porrusalda piska bat  
ondoren hurrena
- J.S. - Horrekin gelditzea  
litzateke pena
- I.M. - Hilabetez gutxinez  
badet rejimena. (bis)

2

- J.S. - Hori da bertsoari  
eskatzen zaiona  
eskatzen zaiona
- I.M. - Serioan serio  
eta broman broma
- J.S. - Gai bat arina bazan  
bestia sakona
- I.M. - Batzuentzat tristura  
besten zoriona
- J.S. - Gauz bat beintzat izan da  
afaria ona. (bis)

4

- J.S. - Kilo t' erdi gizendu  
afari batian  
afari batian
- I.M. - Izan ere jan baitut  
larrua betian
- J.S. - Eskerrak gero astea  
hor degun tartian
- I.M.- Aizu, pixatuko naiz  
etxera joatian
- J.S. - Zer esan behar dizu  
harek ikustian. (bis)

6

- J.S. - Hori entzunda grazi  
egin dit benetan  
egin dit benetan
- I.M.- Zergatik jarri bear zan  
gaur inor penetan
- J.S. - Hau berea aitortzen  
hain modu finetan
- I.M.- Koipe gehiegi daukat  
sabel barrenetan
- J.S. - Ta zer gertatuko da  
besteen etxetan. (bis)

# Literatura

---

7

- I.M.- Horruntza joateko  
nai zun aitzakia  
nai zun aitzakia
- J.S. - Bein behar ta asmatu  
degu egokia
- I.M.- Mai hori erdi hutsa  
hau bete-betia
- J.S. - Ez al zan hobe batzuk  
haruntza joatia
- I.M.- Autobus haundia ta  
autobus txikia. (bis)

9

- I.M.- Beraz, afaltzekoan  
beroiek azkena  
beroiek azkena
- J.S. - Ah, ze ordaina hoiei  
ematen zaiena
- I.M.- Gainera jango zuten  
hemen sobran dena
- J.S. - Eta guretzat berriz  
parterik onena
- I.M.- Gaur hoiek egin dute  
hemen lan geiena. (bis)

11

- I.M.- Gaur ere jardun dira  
aurrera ta atzera  
aurrera ta atzera
- J.S. - Goiz etorriko ziran  
dana prestatzera
- I.M.- Sukaldari fin batek  
oi duen antzera
- J.S. - hala ere gustora  
gero joan etxera
- I.M.- orain Jokin joango da  
ontzik garbitzera. (bis)

8

- J.S. - Sukaldariak hauntza  
ditugu bialdu  
ditugu bialdu
- I.M.- Naizta honuntza ere  
gustora azaldu
- J.S. - Janaria ekartzera  
hoiek honuntz heldu
- I.M.- Hoiek ere ez dituk  
askorik argaldu
- J.S. - Aurrena etorri ta  
azkena afaldu. (bis)

10

- J.S. - Sukaldarik famatzen  
ai gera pikardiz  
ai gera pikardiz
- I.M.- Gauza bera esanez  
gu bein eta berriz
- J.S. - Portatu dira afari  
hain ederra jarriz
- I.M.- Edaria're ekarri  
neurri on ta neurriz
- J.S. - hurrena etortzian  
zuek lana ein berriz. (bis)

12

- J.S. - Ni etxian garbitzen  
aritua nago  
aritua nago
- I.M.- gaur ere bota digu  
gezur bat gehiago
- J.S. - ontzik garbitu ditut  
gaur baino lenago
- I.M.- begira egotea du  
askoz nahiago
- J.S. - baina ez dakit garbitzen  
lau baino gehiago. (bis)

- I.M.- Beraz ez da onegi  
ontziak garbitzen  
ontziak garbitzen
- J.S. - pila haundiarekin  
enaiz atrebitzen
- I.M.- bertsotan' e ai gera  
geiegi luzatzen
- J.S. - etorria degu-ta  
ni enaiz harritzen
- I.M.- agur bana eginda  
isildu ta guazen. (bis)

bukaerako agurra.

J. Sorozabal

Gai jartzailearekin  
hainbat tira-bira  
azkenerako zerbait  
ein degu sikira.  
Ta gero ere berriz  
Lezoko herrira  
bertsolariak pozik  
etorriko dira  
Kristo bizarrik gabe  
dagoen tokira.

I. Murua

Jardunak gera elkarrizketan  
lorea edo demanda  
lagunartea guretzat behintzat  
gogoangarri izan da.  
Gure bertsoak amaitu dira  
eskerrik asko emanda  
beste bat arte, agur denori  
orain zuena da txanda.

Besterik gabe, gabon eta eskerrik asko hemen bildu zareten guztioi eta aurrerantze-  
an ere horrelako asko egin ditzagula.

TRANSKRIBATZAILEA: AGUSTINA PONTSTA GARMENDIA  
JOXE LUIX AGIRRETXE